



KEMENTERIAN EKONOMI
JABATAN PERANGKAAN MALAYSIA

KENYATAAN MEDIA

PRESTASI EKONOMI MALAYSIA PADA SUKU TAHUN PERTAMA 2024

KDNK Malaysia terus berkembang 4.2 peratus pada suku tahun pertama 2024

PUTRAJAYA, 17 Mei 2024 – Keluaran Dalam Negeri Kasar (KDNK) Malaysia pada suku tahun pertama 2024 berkembang 4.2 peratus berbanding 2.9 peratus pada suku tahun keempat 2023. Bagi terma pelarasan musim suku tahun ke suku tahun, KDNK meningkat 1.4 peratus (ST4 2023: -1.0%) pada suku tahun ini. Prestasi ekonomi bulanan masing-masing meningkat sebanyak 4.8 peratus dan 5.0 peratus untuk Januari dan Februari, sebelum bertumbuh perlahan kepada 2.9 peratus pada bulan Mac 2024. Ini dilaporkan oleh Jabatan Perangkaan Malaysia (DOSM) dalam siaran KDNK bagi Suku Tahun Pertama 2024 pada hari ini.

Pertumbuhan ekonomi untuk suku tahun ini didorong oleh perbelanjaan penggunaan isi rumah yang tinggi, disokong oleh keadaan pasaran buruh yang stabil dan kadar pengangguran yang rendah. Musim perayaan dan permulaan sesi persekolahan 2024 antara faktor yang menyumbang kepada peningkatan dalam perbelanjaan isi rumah, di samping pembayaran Insentif Awal Kajian Semula Sistem Saraan Perkhidmatan Awam kepada semua penjawat awam dan Sumbangan Tunai Rahmah pada awal tahun ini. Selain daripada itu, bilangan ketibaan pelancong yang tinggi pada suku tahun ini juga telah meningkatkan aktiviti berkaitan pelancongan. Prestasi ekonomi pada suku tahun ini juga disumbangkan oleh pembangunan projek berskala besar dan pelaburan dalam pusat data serta penambahbaikan tempoh permohonan kemasukan pekerja asing bagi menampung keperluan permintaan pekerja khususnya di sektor perladangan.

Menurut Ketua Perangkawan Malaysia, Dato' Sri Dr. Mohd Uzir Mahidin, "Sektor Perkhidmatan memacu prestasi keseluruhan dan sektor Pembuatan menunjukkan peningkatan selepas mencatatkan penurunan pada suku tahun sebelumnya. Selain itu, Perbelanjaan penggunaan akhir isi rumah dan Pembentukan modal tetap kasar terus memacu pertumbuhan pada suku tahun ini."

Beliau menambah, "Dari segi prestasi sektoral, sektor **Perkhidmatan** berkembang sebanyak 4.7 peratus (ST4 2023: 4.1%) pada suku tahun pertama 2024. Prestasi yang memberangsangkan ini disumbangkan oleh subsektor Perdagangan borong & runcit (3.8%) dan Pengangkutan & penyimpanan (11.0%). Bagi terma pelarasan musim suku tahun ke suku tahun, sektor Perkhidmatan meningkat sebanyak 1.2 peratus (ST4 2023: -1.1%)."

Sektor **Pembuatan** meningkat 1.9 peratus pada suku ini selepas mencatatkan penurunan 0.3 peratus pada suku tahun sebelumnya. Pertumbuhan ini didorong oleh industri yang berorientasikan domestik terutamanya pembuatan Produk mineral bukan logam, logam asas, dan produk logam yang direka (7.2%) manakala industri berorientasikan eksport seperti produk Petroleum, bahan kimia, getah & plastik (1.1%) pulih pada suku tahun ini. Walau bagaimanapun, pembuatan Minyak dan lemak daripada sayuran & haiwan merosot sebanyak 0.4 peratus. Bagi terma pelarasan musim suku tahun ke suku tahun, sektor Pembuatan meningkat 2.4 peratus (ST4 2023: -2.0%).

Sektor **Perlombongan & pengkuarian** menunjukkan pertumbuhan yang lebih baik iaitu 5.7 peratus selepas mencatatkan kenaikan sebanyak 3.5 peratus pada suku tahun keempat 2023. Peningkatan ini disokong oleh semua subsektor, terutamanya subsektor Gas asli yang berkembang 9.0 peratus. Bagi terma pelarasan musim suku tahun ke suku tahun, sektor ini menurun 1.4 peratus (ST4 2023: 2.5%).

Sektor **Pertanian** bertumbuh 1.6 peratus pada suku tahun pertama 2024 (ST4 2023: 1.9%) dipacu oleh subsektor Kelapa sawit dan Ternakan. Selain itu, subsektor Perikanan laut, Getah, dan Pertanian lain juga menunjukkan peningkatan pada suku ini. Walau bagaimanapun, subsektor Akuakultur dan Perhutanan & pembalakan terus merosot pada suku tahun pertama 2024. Sektor ini menyusut sebanyak 0.8 peratus (ST4 2023: 2.4%) bagi terma pelarasan musim suku tahun ke suku tahun.

Sektor **Pembinaan** mencatatkan pertumbuhan yang memberangsangkan sebanyak 11.9 peratus (ST4 2023: 3.6%). Peningkatan ini disokong oleh subsektor Kejuruteraan awam dan Aktiviti Pembinaan khas dengan pertumbuhan masing-masing sebanyak 23.5 peratus dan 11.4 peratus. Bagi terma pelarasan musim suku tahun ke suku tahun, sektor ini mencatatkan peningkatan 7.9 peratus (ST4 2023: -3.5%).

Mengulas lanjut, Ketua Perangkawan Malaysia menyatakan bahawa "**Penggunaan akhir swasta atau perbelanjaan isi rumah**, yang menyumbang 61.9 peratus kepada KDNK, berkembang 4.7 peratus (ST4 2023: 4.2%) disokong oleh peningkatan perbelanjaan dalam Perumahan, air, elektrik, gas & bahan api lain (7.5%), Makanan & minuman bukan alkohol (4.0%) dan Pengangkutan (6.4%). Bagi terma pelarasan musim suku tahun ke suku tahun, prestasi keseluruhan mencatatkan peningkatan 1.8 peratus (ST4 2023: -1.0%)."

Pembentukan modal tetap kasar (PMTK) atau pelaburan dalam aset tetap, berkembang sebanyak 9.6 peratus (ST4 2023: 6.4%) pada suku tahun pertama 2024. Prestasi PMTK disumbangkan oleh Struktur (10.7%), Jentera & peralatan (9.2%) dan Aset lain (4.6%). Selain itu, PMTK mengikut sektor meningkat dalam kedua-dua sektor Awam dan Swasta pada suku tahun ini. Bagi terma pelarasan musim suku tahun ke suku tahun, PMTK mencatatkan peningkatan 2.8 peratus (ST4 2023: 1.0%).

Perbelanjaan penggunaan akhir kerajaan bertumbuh sebanyak 7.3 peratus (ST4 2023: 5.8%), didorong oleh peningkatan perbelanjaan ke atas bekalan dan perkhidmatan. Bagi terma pelarasan musim suku tahun, Perbelanjaan penggunaan akhir kerajaan menurun 0.7 peratus (ST4 2023: 0.3%).

Beliau juga menyebut bahawa "Kedua-dua **Eksport** dan **Import** masing-masing meningkat sebanyak 5.2 peratus (ST4 2023: -7.9%) dan 8.0 peratus (ST4 2023: -2.6%), selepas mencatatkan pertumbuhan negatif pada suku tahun sebelumnya disebabkan oleh permintaan luar yang lebih baik. Oleh itu, **Eksport bersih** mencatatkan negatif yang lebih rendah sebanyak 24.5 peratus berbanding penurunan 52.9 peratus pada suku tahun sebelumnya."

Selain pengumuman hari ini, DOSM turut menerbitkan laporan tahunan KDNK bagi tahun 2023 yang merangkumi semakan semula data KDNK bagi tahun 2021, 2022, dan 2023 masing-masing pada 3.3 peratus, 8.9 peratus dan 3.6 peratus. Semakan semula adalah berdasarkan pengemaskinian laporan tahunan Syarikat yang dikemaskini, Survei Pertubuhan Tahunan (AES) 2021, Banci Ekonomi 2022 (BE 2022) serta data sekunder daripada agensi yang berkaitan.

Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

DOSM akan menjalankan Banci Pertanian pada tahun 2024. Sila layari <https://www.myagricensus.gov.my/> untuk maklumat lanjut. Tema adalah "Banci Pertanian, Kunci Kemajuan Pertanian."


Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah "Statistik Nadi Kehidupan". DOSM menyambut ulang tahun ke 75 Jubli Intan pada tahun 2024.

Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
17 MEI 2024


LAMPIRAN 1

**Carta 1: Keluaran Dalam Negeri Kasar (KDNK),
ST1 2021 – ST1 2024 dan 2019 – 2023**




Sumber: Jabatan Perangkaan Malaysia

Carta 2: Pertumbuhan KDNK Tahunan, 2000 – 2023




Sumber: Jabatan Perangkaan Malaysia

Carta 3: Pertumbuhan KDNK Bulanan dan Suku Tahunan, 2021-2024




Sumber: Jabatan Perangkaan Malaysia

Carta 4: Pertumbuhan KDNK Suku Tahunan mengikut Jenis Aktiviti Ekonomi, ST4 2023 & ST1 2024




Sumber: Jabatan Perangkaan Malaysia

Carta 5: Pertumbuhan KDNK Suku Tahunan mengikut Jenis Perbelanjaan, ST4 2023 & ST1 2024




Sumber: Jabatan Perangkaan Malaysia

Carta 6: Pertumbuhan KDNK Bulanan Mengikut Jenis Aktiviti Ekonomi, Januari – Mac 2024




Sumber: Jabatan Perangkaan Malaysia

**Carta 7: KDNK Pelarasan Musim
(Perubahan Peratusan dari Suku Tahun Sebelumnya), ST1 2019 – ST1 2024**



Sumber: Jabatan Perangkaan Malaysia

Carta 8: Pendapatan Negara Kasar (PNK) Per Kapita, ST1 2020 – ST1 2024



Sumber: Jabatan Perangkaan Malaysia

Carta 9: Perbandingan KDNK dengan Negara Terpilih

KDNK Kadar Pertumbuhan YoY (%)	2022	2023	2022				2023				2024	
			ST1	ST2	ST3	ST4	ST1	ST2	ST3	ST4	ST1	
NEGARA ASEAN												
 Malaysia	8.9	3.6	5.1	8.9	14.4	7.4	5.5	2.8	3.1	2.9	4.2	
 Singapura	3.8	1.1	4.2	4.6	4.2	2.4	0.5	0.5	1.0	2.2	2.7	
 Indonesia	5.3	5.1	5.0	5.5	5.7	5.0	5.0	5.2	4.9	5.0	5.1	
 Filipina	7.6	5.5	8.1	7.5	7.7	7.1	6.4	4.3	6.0	5.5	5.7	
NEGARA LAIN												
 Amerika Syarikat	1.9	2.5	3.6	1.9	1.7	0.7	1.7	2.4	2.9	3.1	3.0	
 Kesatuan Eropah	3.5	0.4	5.6	4.2	2.6	1.8	1.2	0.6	0.1	0.2	0.5	
 Sepanyol	5.8	2.5	6.8	7.2	5.4	3.8	4.0	2.0	1.9	2.1	2.4	
 Itali	4.0	0.9	6.6	5.3	2.8	1.9	2.2	0.6	0.6	0.7	0.6	
 Perancis	2.5	0.7	4.3	3.8	1.4	0.7	0.8	1.1	0.7	0.8	1.1	
 United Kingdom	4.3	0.1	11.4	3.9	2.1	0.6	0.3	0.2	0.2	-0.2	0.2	
 Republik Rakyat China	3.0	5.2	4.8	0.4	3.9	2.9	4.5	6.3	4.9	5.2	5.3	
 Republik Korea	2.6	1.4	3.1	2.9	3.2	1.4	0.9	0.9	1.4	2.2	3.4	

Sumber: Laman web rasmi Agensi Statistik Negara Terpilih